



## Тимофейге язылган биринчи кагъыз

Павелни Тимофейге язылган биринчи кагъызында (экинчисинде йимик) Исагъа иман салганланы жыйыныны къуллукъчуларыны хасиятлары ва оланы борчлары гъакъда сёйлене. Бу эки де кагъызны язылмакълыгыны себеплери ва оланы муратлары оъзю Павелни сёзлеринден ачыкъ гёрюнюп тура: «... Аллагъны уягълюсюнде, демек гъакъ герти Аллагъны жыйынында, инсанлар оъзлени нечик юрютмеге герегин сен билип къалсын деп, сагъа бу насигъатланы язаман. Жыйын буса – гъакъ гертиликни кюрчюсю ва орта багъанасы» (3:15-16).

Биринчи кагъызын Павел Македониядагъы заманында язган болмагъа герек. Павел кърдашы ва иш ёлдашы Тимофейни, тилеп, арагъа чыкъган ялган уйретивлеге кършы иш гёрсюн учун, Эфес шагъарда къоя. Павел оъзю де Эфесге бармагъа хыял эте болган, тек шогъар бир-бир агъвалатлар пуршав этип турган. Шо саялы о Тимофейге кагъыз яза, огъар къаныгъывлу кюйде, къатты иманы да булан башлагъан ишин давам этмеге чакъырыв эте.

Эфесде Тимофей жыйын булан байлавлу бир нече масъаланы чечмеге герек болган: бирлери Исагъа иман салганлагъа уйленмекни гери ура болганлар, башгалары ашгъа байлавлу бир-бир гёрсетивлени борч гысаплаганлар. Оъзюю кагъызында Павел Исагъа иман салганланы жыйыныны кёп яшавлукъ масъалаларыны устьюнде токътай. Ону ойлары ва чыгъарган гъасиллери Эфесдеги жыйынны Инжилдеги даимлик гъакъ герти уйретивлеге, демек Иса Месигъе ва О инсанлагъа таклиф этеген къутгъарылыгъа къайтармагъа кёмек этмеге герек болган. Раббиз бары да инсанлар къутгъарылгъанын ва Оъзюю гъакъ гертиликне тюрленгенин сюе. Шо саялы да Исагъа иман салганлар шо гъакъ гертиликни яшыртгъынлыкъда сакълап турмагъа тюршмей, Аллагъны тюрлендиреген рагъмусу гъакъда иманы ачыкъдан шагъатлыкъ этеген кюйде яшамагъа тюрше.

*Башлаггы саламлар*

**1** Бу кагъызны мен, Иса Месигъни элчиси болгъан Павел, язаман. Мен Къутгъарывчубуз Аллагъны ва умутубуз болгъан Иса Месигъни буйругъу булан тангландым. <sup>2</sup> Иман ёлунда мени герти уланым болгъан Тимофейге салам! Атабыз Аллагъдан ва Раббиз Иса Месигъден сагъа зор яхшылыкъ, рагъму ва паракхатлыкъ болсун!

*Ялгъан уйретивлени гъакъында бுவары*

<sup>3</sup> Мен Македониягъа баргъанда, сагъа Эфесде къалып, ялгъан уйретивлени билдиреген адамланы токътат деп бுவардым. <sup>4</sup> Олагъа къайдагъы ёкъ затлагъа ва оьзлени тайпа-тухумуну тамурларын ахтарывгъа тергев бере турмасын деп де айт. Имандан таба яшавгъа Аллагъ чыгъарагъан хыяллагъа шо затланы гъеч бир пайдасы болмай, янгыз эришивлюклер тувдура. <sup>5</sup> Таза юрекден гелеген сююв, герти намус ва гъакъ юрекли иман – бу буйрукъну мурады. <sup>6</sup> Биревлер, шоланы барын да къююп, маънасыз хабарлар булан машгъул болмагъа башлагъанлар. <sup>7</sup> Олар Мусаны Къанунун уйретеген устазлар болмагъа сюелер, оьзлер буса не зат айтагъанын ва къаст этип токъташдырагъан затларын англамайлар.

<sup>8</sup> Тюз кюйде къолласа, Къанун яхшы зат экенни биз билебиз. <sup>9</sup> Биз дагъы да булай затны билебиз: Къанун муъминлер учун чыгъарылмагъан, ону бузагъанлар, биревню де гъакимлигин къабул этмейген, аллагъсызлар, гюнагъ ишлер этегенлер, сыйсызлыкъ этегенлер, сыйлы затланы хорлайгъанлар, оьз атасын яда анасын оьлтюрегенлер, оьлтюрювчюлер, <sup>10</sup> пасатлыкъ юртегенлер, эргишиге ювукълукъ этеген эргишилер, къул сатагъанлар, ялгъанчылар, ялгъан шагъатлыкъ этегенлер, гъакъ герти уйретивге къаршы чыгъагъан ишлени этегенлер учун чыгъарылгъан. <sup>11</sup> Шо уйретив макътавлу Аллагъны магъа инанылгъан макътавлу хабарыны ичине гийирилген.

*Аллагъны рагъмусу саялы шюкюрлюк этив*

<sup>12</sup> Магъа къуват береген Раббиз Иса Месигъге шюкюр этемен. Неге тюгюл де, О мени инамлы деп гъисап этип, магъа Оьзюне къуллукъ этме тапшурду. <sup>13</sup> Алда мен капирлик этдим, гъызарлап юрюдюм, хагирлер къалдырдым. Амма Аллагъ магъа рагъму этди, неге тюгюл де мен шо затланы англавсузлугъумдан ва иманым ёкълугъумдан эте эдим. <sup>14</sup> Раббизни зор яхшылыкъ артыкъ кюйде гёрсетилип, магъа Иса Месигъден гелеген иман ва сююв берилди.

<sup>15</sup> «Иса Месигъ бу дюньягъа гюнагълыланы къутгъармакъ учун гелген» деген сёзлер – къабул этмеге лайыкълы болгъан инамлы сёзлер. Шо гюнагълыланы да инг биринчиси менмен. <sup>16</sup> Менде – гюнагълыланы

инг биринчисинде – Иса Месигъ Оьзюню дазусуз даражадагъы сабурлугъун гёрсетип болсун учун, магъа рагъму этилди. Шолайлыкъда, Исагъа иман салып, даимлик яшав алажакълар учун мен уьлгю болуп токътажакъман. <sup>17</sup> Даимлик Пачабыз, оьлмежек, гёрюнмейген ва бир болгъан Аллагъгъа гъар даим гъюрмет ва макътавлар болсун! Амин.

<sup>18</sup> Балам Тимофей, сени гъакъынгдан алда сёйленген пайхаммарлыкъ сёзлеге гёре, мен сагъа бу насигъатланы тапшураман. Оланы кёмеклиги булан лайыкълы кюйдеги ябушув юрютюп тур. <sup>19</sup> Иманынгда къатты кюйде тур, намусунгнү таза сакъла. Бир-биревлер намусун тас этдилер, оланы иманы да денгизде батылгъан гемедей ёкъ болду. <sup>20</sup> Гъименей ва Искендер шолайлардан. Капирлигин кюйдурмакъ учун, мен оланы иблисге тапшургъанман.

**2** <sup>1-2</sup> Мен биз паракхат, рагъат, Аллагъ сюеген ёлда юрюп ва Огъар гъюрмет этип яшап болгъаныбызны сюемен. Шо саялы да бары затдан алда сагъа бары да инсанлар, пачалар, бары да гъакимликни башын тутгъанлар учун Аллагъгъа даим дуа этмекни, тилемекни, ялбармакъны, Огъар шюкюрлюк этмекни тилеймен. <sup>3</sup> Шолай дуалар яхшы бола, Къутгъарывчубуз болгъан Аллагъ да оланы ушата. <sup>4</sup> О бары да инсанлар къутгъарылгъанны ва гъакъ гертиликни билгенни сюе. <sup>5</sup> Аллагъ бирдир, Аллагъ булан инсанланы арачылыкъын юртеген де бирдир. Шо арачы буса Инсан болгъан Иса Месигъдир. <sup>6</sup> Бары да инсанланы гюнагъларындан къутгъармакъ учун, О Оьзюн къурбан этди. Шоллукъда, Аллагъны белгилеген заманында Иса Месигъ – Ону дюньягъа бакъгъан якъдагъы сюювюню шагъатлыкъы. <sup>7</sup> Аллагъ мени Оьзюню хабарчысы, элчиси, ят халкълар учун гъакъ иманны уйретеген устаз этип белгиледи. Мен сизге гертисин сёйлеймен, ялгъан айтмайман. <sup>8</sup> Шо-гъар гёре, эришивлюклени де, къазапланывну да къююп, инсанлар таза къолларын оьрге гётерип дуа этгенни сюемен.

*Иманлы эргишилени**ва къатынгишилени гъакъында*

<sup>9</sup> Къатынгишилер саламат, илиякълы ва эдепли кюйде гийингенни сюемен. Оьзлени олар бурма чачлары, алтынлар, жавгъарлар, багъалы гийимлер булан безендирме герек тюгюл. <sup>10</sup> Шоланы орнуна Аллагъгъа сужда этемен деп гъисаплайгъан гъар къатынгиши этмеге тюшеген яхшы ишлери булан безендирилсинлер. <sup>11</sup> Къатынгишилер къавгъасыз ва толу табиликде уйренсинлер. <sup>12</sup> Къатынгишиге эргишилени уйретмекни ва олагъа башчылыкъ этмекни мен гери ураман. Терсине, о иннемей тынглап турма тарыкъ. <sup>13</sup> Биринчи болуп яратылгъан Адам, Гъава буса сонг яратылгъан. <sup>14</sup> Башлап алдатылгъан да Адам тюгюл; ялгъангъа

инангъан ва гюнагъ иш этген къатынгиши. <sup>15</sup> Буса да иманы, сююво, юрегинде Аллагъ булан ва сав гъакъыллы кюйде яшаса, яшлар табып, къатынгишилер де къутгъарылажакъ.

*Жыйынны ёлбашчысыны  
алдына салынагъан талаплар*

**3** <sup>1</sup> Муна инамлы сёзлер: эгер де бирев Исагъа иман салгъанланы жыйыныны ёлбашчысы болмагъа сюе буса, ону хыялы нечакъы да яхшы. <sup>2-3</sup> Жыйынны ёлбашчысы болагъан гиши буса сёз табып болмасдай, янгыз бир къатыны булангъы, озюн енгип сакълап, айыкъ пикир этип болагъан, абуру булангъы, къонакъланы къабул этме сюеген адам болма тюше. О озгелени уйретип бажармагъа герек. Ичкичи, къалмагъалчы болма тюшмей, юваш хасиятлы, парахатлыкъны сюеген адам болма тюше. О акъчагъа сутур болма тюшмей. <sup>4</sup> О агълюсюне яхшы башчылыкъ этеген, авлетлери озюне гъюрмет этеген ва ону буйрукъларын кютеген адам болмагъа тюше. <sup>5</sup> Озюню агълюсюн юрютюп болмайгъан гиши Исагъа иман салгъанланы жыйынына нечик башчылыкъ этер? <sup>6</sup> Ёлбашчыны Исагъа янгы иман салгъанлардан сайламагъа тюшмей. Шолай адам октем болуп къалмагъа болар ва шо заман о иблис йимик налатланыр. <sup>7</sup> О биябур болмасын ва иблисни тузагъына тюшюп къалмасын учун, жыйын булан байлавлугъу ёкълар да ону яхшы адам гысапда танымагъа тарыкълар.

*Жыйынны кёмекчилерини  
алдына салынагъан талаплар*

<sup>8</sup> Жыйынны кёмекчилери де шолай адамлар болмагъа тарыкълар. Олар абурлу болмагъа тюше, экиюзлю, ичкичи, акъчагъа сутур болма тюшмей. <sup>9</sup> Оланы таза намусу болма тарыкъ, олар иманны сырлы гъакъ гертиликлерине берилме де герек. <sup>10</sup> Бир башлап шо адамланы тергеп къарамагъа тарыкъ, сонг, оланы гъеч бир айыбы табулмаса, олар кёмекчилени къуллугъун кютеме боларлар. <sup>11</sup> Кёмекчи къатынлар да шолай абурлу адамлар болмагъа тарыкълар. Олар айтды-къуйтдуну юрютмейген, озлени енгип сакълап болагъан, бары да затда инамлы болмагъа тарыкълар. <sup>12</sup> Кёмекчини бир къатыны болма тюше. Яшларына яхшы къарайгъан ва уягълюсюн яхшы юрютюп бажарагъан адам болмагъа тарыкъ. <sup>13</sup> Яхшы къуллукъ этгенлер тийишли даражагъа ва Иса Месигъе бакъгъан якъдагъы иманда мекенли токъташгъанлыкъгъа етише.

<sup>14-15</sup> Мени ювукъ арада сени янынга гелмеге умутум бар. Амма мен гечигип къалсам, Аллагъны уягълюсюнде, демек гъакъ герти Аллагъны жыйынында, инсанлар озлени нечик юрютеме герегин сен билип къалсын деп, сагъа бу насигъатланы язаман. Жыйын буса – гъакъ

гертиликни кюрчюсю ва орта багъанасы. <sup>16</sup> Бизин Аллагъгъа байлавлу инанывларыбызны сыры уллу экенни бирев де инкар этмес:

*О къаркъарада гёрюндю, Аллагъны Ругъу булан тасдыкъ болду,  
малайиклер Ону гёрдю,  
Ону гъакъында халкълагъа билдирилди, Огъар дюньяда халкълар  
иман салдылар, макътавлугъу булан оьрге алынды.*

*Озью Тимофейге этилген насигъатлар*

**4** <sup>1</sup> Аллагъны Ругъу ахыр заманда кёплер иманындан тайышажагъын, жинлер ойлашып чыгъаргъан затлагъа, оланы ялгъан уйретивлерине инанажагъын ачыкъ кюйде айта. <sup>2</sup> Бу жура уйретивлер намусун тас этген экиюзлю макюрчюлерден таба яйылажакъ. <sup>3</sup> Шо макюрчюлер къатын алмакъны гери ура, бир тюрюлю ашланы ашама ярамай деп уйрете. Шо ашланы чы Аллагъ гъакъ гертиликни билегенлер ва огъар инанагъанлар шюкюрлюк булан къабул этсин деп яратгъан. <sup>4</sup> Аллагъ яратгъан чакъы бары да зат яхшы, шюкюрлюк булан къабул этилеген бары да зат да гери урулмагъа болмас. <sup>5</sup> Неге тюгюл де, Аллагъны каламы ва дуа гъар не затны да къабул этдирер.

<sup>6</sup> Эгер сен, Тимофей, иман къардашлагъа булай насигъатланы берсенг, иманны сёзлерин ва сен тюшонген шо гъакъ герти уйретивню эмген Исаны яхшы къуллукъчусу болурсан. <sup>7</sup> Къайдагъы бош ёмакълагъа, маънасыз къатын хабарлагъа негъакъ заманынгны йиберме. Ругъ якъдан чыныгъа туруп, яшавунгуну Аллагъ сюеген ёлда оьтгер. <sup>8</sup> Къаркъарасын чыныкъдырмакъны белгили бир пайдасы да бар, тек о айтардай олай кёп тюгюл. Ругъ якъдан чыныгъыв буса бизге бу яшавда ва даимлик яшавда пайда гелтирер. <sup>9</sup> Муна герти, къабул этмеге лайыкълы болгъан сёзлер. <sup>10</sup> Шону учун, къаныгъывлу кюйде загъмат тёге туруп, къаст этебиз, неге тюгюл де биз гъакъ герти Аллагъгъа аркъа таяйбыз, О буса бары да инсанланы, айрокъда иман салгъанланы, Къутгъарывчусудур.

<sup>11</sup> Инсанлагъа шону бувар ва оланы шогъар уйрет. <sup>12</sup> Сен жагъил деп бирев де сагъа сансымай къарамасын. Сёзде, яшавда, сюювде, иманда ва тазалыкъда Исагъа иман салгъанлагъа уылгю бол. <sup>13</sup> Мен гелгинче, адамлагъа Сыйлы Язывланы охув, насигъат берив ва уйретив булан бюс-бютюнлей машгул бол. <sup>14</sup> Сенде бар ругъ савгъатны тергевсюз кюйма. Жыйынны ёлбашчылары, устьюнге къолларын да салып, Аллагъны атындан сёйлегенде, сагъа шо ругъ савгъат берилген эди.

<sup>15</sup> Бу затлагъа тергев бакъдыривунгуну давам эт, булар булан къасткъылып машгул бол. Шо заман бары да адамлар сени устьюнлюгюнню гёрер. <sup>16</sup> Оьз-оьзюнге ва оьзюнг уйретеген затлагъа тергев эт. Бу затлагъа юрегингни салып иш гёр. Эгер сен шолай этсенг, оьзюнгню ва сагъа тынглайгъанланы къутгъарырсан.

**5** <sup>1</sup>Бир заманда да чагы улуу эргишиге бетхатирсиз сөйлеме, атанга ялбарагъан да йимик, огъар да ялбар. Жагыллеге агъанга, ининге йимик, <sup>2</sup>улуу къатынлагъа ананга йимик янаш. Къызыяшлагъа къызардашларынга йимик, таза юрек булан янаш.

#### *Тул къатынланы гъакъында*

<sup>3</sup>Гертилей де тарчыкъ гъалгъа тюшген тул къатынланы абурлап гъайын эт. <sup>4</sup>Эгер тул къатынны яшлары яда яшларыны да яшлары бар буса, оз аглюсюню ва ата-анасыны гъайын этмек булан олар озлени иманын гөрсетмеге гереклер. Аллагъ да шотай сюе. <sup>5</sup>Озюню гъайын этме биревю де ёкъ янгыз къалгъан герти тул къатын буса янгыз Аллагъгъа умут эте, гечеси-гюню булан дуа да эте туруп, Ондан кёмек тилей. <sup>6</sup>Амма тул къалгъан къатын кепи сюйгенни этип яшай буса, ону оылген деп гысап этип къоймагъа ярай. <sup>7</sup>Адамлагъа шо насигъатланы бер, сонг олар айыплы болмасын. <sup>8</sup>Озюню къардашларыны, айрокъда аглюсюню гъайын этмейген гиши имандан чыкъгъандыр ва имансыздан да бетердир.

<sup>9</sup>Тул къалгъан къатынланы санавуна янгыз алтмыш йыл тамамлангъанланы ва янгыз бир керен эрде болгъанланы къош. <sup>10</sup>Шо къатын яхшы ишлери булан белгили, яшларын тарбиялайгъан, къонакъны сююп къабул этеген, хыйлы керенлер Аллагъны халкъына гъалал кюйде къуллукъ этеген, къыйынлыкъгъа тюшгенлеге кёмеклешеген ва озюню гъар тюрлю яхшы ишлер этивге багъышлайгъан болмагъа тюше.

<sup>11</sup>Жагыл тул къатынланы бу санавгъа къошма, неге десе, оланы Месигъе этеген къуллугъундан эсе, къаркъарасыны напсы гючленгенде дагъы да къайтып эрге бармагъа сюегени артыкъ болур. <sup>12</sup>Алда берген сёзюню бузгъанда, олар озлер озлени айыпгъа салалар. <sup>13</sup>Мундан къайры да, олар заманны бош олтгеривге ва уйден-уйге юрювге уйренип къалалар. Олар янгыз заманны бош олтгерип къоймай, дагъы да айтды-къуйтдуну сөйлемеге, озгелени ишлерине баш сукъмагъа башлайлар ва сөйлемеге тюшмейген затланы сөйлейлер. <sup>14</sup>Шо саялы мен жагыл тул къатынлагъа эрге бармакъ, яшлар тапмакъ, уй къуллугъун кютмек ва душманлагъа гъеч бир бугътан сөйлемеге багъана бермей турмакъ яхшыдыр деп маслагъат этемен. <sup>15</sup>Оланы бирлери тюз ёлдан чыгып, иблисни ёлуна тюшюп де битгенлер. <sup>16</sup>Эгер иманлы къатынны къардашларыны арасында тул къалгъан къатынлар бар буса, олагъа кёмек этмекни Исагъа иман салгъанланы жыйыныны устюне салмайлы, олагъа озю шо къатын кёмек этмеге герек. Шо заман жыйын янгыз къалгъан тул къатынланы гъайын этмеге болар.

#### *Жыйынны ёлбашчыларыны гъакъында*

<sup>17</sup>Исагъа иман салгъанланы жыйынына яхшы ёлбашчылыкъ этеген, айрокъда Аллагъны каламын билдиривде ва уйретивде къаныгъывлукъ гөрсетеген ёлбашчылар эки къабат артыкъ макътавгъа лайыкылы. <sup>18</sup>Сыйлы Язывларда: «Ашлыкъ басагъан озгюзю авзун байлама», «Ишлейген адам озюне тийишли гъакъгъа лайыктылдыр», — деп язылгъан. <sup>19</sup>Ёлбашчылагъа къаршы этилген айыпны, янгыз ону эки яда уьч шагъат гертилесе, къабул эт. <sup>20</sup>Гюнагъ иш этегенлеге жыйынны бары да адамларыны алдында ачыкъ кюйде айып эт; къалгъанлагъа да шо дарс болуп къалсын.

<sup>21</sup>Аллагъны, Иса Месигъни ва О танглагъан малайиклени алдында сакъа бары да затда шо насигъатлагъа гөре юрюме бувараман. Гъеч биревню биревден артыкъ гөрме ва гъеч биревге ян тартма. <sup>22</sup>Кимни буса да биревню гюнагъларына ортакъчы болмас учун, биревню де устюне алгъасап къолларынгны салып\* къойма. Бары да затда таза болмагъа къаст эт.

<sup>23</sup>Янгыз бир сув ичип тургъанынг таман, аз-маз чагъырны да къолла. О ашкъазангъа пайдалы. Шо заман сен олай чакъда-чакъда авруй турмажакъсан.

<sup>24</sup>Бир-бир адамланы гюнагълары гъали ва къыяматгюн болгъунча ачыкъдан гөрюнюп тура. Биревленики буса гечге таба белгили болажакъ. <sup>25</sup>Тап шо кюйде яхшы ишлер де ачыкъдан гөрюнюп тура, ачыкъдан гөрюнмей турагъанлары буса гечге таба белгили болуп къала.

#### *Къулланы гъакъында*

**6** <sup>1</sup>Аллагъны аты ва Ону гъакъындагъы уйретив хорланмасын учун, къуллар озлени есилерине гюрмет булан янашмагъа гереклер. <sup>2</sup>Есилери Исагъа иман салгъан къуллар да, олар булан иман къардашлар болгъанбыз деп, олагъа гюрметсизлик этмесинлер. Терсине, дагъы да яхшы къуллукъ этмеге борчлулар, неге туюл олар къуллукъ этегенлер — Исагъа иман салгъан сююмлю адамлар. Адамланы сен шотай уйретмеге ва шогъар чакъырмагъа тарыкъсан.

#### *Ялган уйретивлер ва гъакъ герти байлыкълар*

<sup>3</sup>Башгъа уйретивню билдирип, Аллагъ сюеген ёлну гөрсетеген Раббиз Иса Месигъни гъакъ герти уйретивю булан рази туюл,

\* 5:22 *Къолларын салмакъ* — Исагъа иман салгъанланы жыйынында юрюлеген адат. Шо адатгъа гөре, жыйында лайыкылы болгъан адамгъа хас дин къуллукъ юрютмеклик тапшурулагъанда, шо жыйынны ёлбашчылары ону устюне къолларын сала.

<sup>4-5</sup> хохабазлыкъ этеген адам буса – бир затны да англамайгъан адам. Шо даим эрише турмагъа, асувсуз хабарланы сёйлеп юрюмеге сюеген бузукъ гъасиретлиги булангъы бир адам. Булар бары да ругъдан бузулгъан, гъакъ гертилик не экенни билмейген инсанланы арасында гюнчюлюк, эришивлюклер, ачувлу сёйлевлер, къайдагъы яман шекликлер, даимлик тюртюшювлер тувдура. Шолай адам Аллагъ сюеген ёлда юрюмеклик бай болувгъа элтеген ёл деп ойлаша.

<sup>6</sup> Аллагъ сюеген ёлда юрюмеклик булан рази болуп къалмакълыкъ буса – инсан учун бир уллу байлыкъ. <sup>7</sup> Биз бу дюньягъа оъзюбюз булан бир зат да алып гелмегенбиз, бу дюнъядан да оъзюбюз булан бир зат да алып гетмеге болмасбыз. <sup>8</sup> Гиймеге опурагъыбыз ва ашамагъа ашыбыз бар буса, рази болуп къаларбыз. <sup>9</sup> Бай болмагъа къаст этегенлер сынагъа ва тузакъгъа тюшер, маънасыз ва зараллы гъаваслыкълагъа бериллип къалар. Шо гъаваслыкълар инсанланы языкълыкъгъа ва оълумге гелтирер. <sup>10</sup> Неге тююл де, акъчагъа гъасиретлик – къайсы яманлыкълар да тамуру. Бир тайпалар оъзлени шогъар бакъгъан якъдагъы къастында имандан тайышды ва оъзлер оъзлеге къагърулу къайгъы гелтирди.

#### *Павелни Тимофейге берген ахырынчы насигъатлары*

<sup>11</sup> Сен, Тимофей, Аллагъны къулусан, шо саялы булай затлардан къачмагъа тарыкъсан. Муъминликге, Аллагъ сюеген ёлгъа, имангъа, сюювге, сабурлукъгъа, адамлар булангъы аралыкъда йымышакълыкъгъа етишмеге къаст эт. <sup>12</sup> Даимлик яшавгъа етишмеге, иманны ёлунда тийишли кюйде юрюмеге къаст эт. Кёп шагъатлар бар ерде сен Исагъа мюкюр болгъан заманда, сен бу яшавгъа чакъырылгъан эдинг. <sup>13</sup> Гъар затгъа яшав береген Аллагъны алдында ва Понтий Пилат бар ерде гъеч бир тартынывсуз шагъатлыкъ этген Иса Месигъни алдында мен сагъа ташдырып айтаман: <sup>14</sup> Раббибиз Иса Месигъ къайтып гележек гюнге ерли сагъа берилген бары да буйрукъланы инамлы кюйде ва гъеч багъанасыз кют. <sup>15</sup> Макътавлу, биргине-бир Гъаким, пачаланы да Пачасы, раббилени де Раббиси болгъан Аллагъ шо гюнню алданокъ белгиледи. <sup>16</sup> Оълмесликге янгыз О ес болгъан. Бирев де Ону гёрмеген ва гёрмеге де болмай. О бирев де ювукълашып болмайгъан нюрде яшап тура. Гъюрмет ва къудрат гъар даим де Онуки болсун! Амин.

<sup>17</sup> Бу дюньядагъы байлагъа бувар: оъктем болмасынлар ва инамлы тююл байлыгъына аркъа таямай, леззет алмакъ учун бизин бары да тарыкъ затлар булан аявсуздан таъмин этеген Аллагъгъа аркъа таясынлар. <sup>18</sup> Оланы яхшылыкълар этмеге, яхшы ишлери булан бай болмагъа, чомарт болмагъа ва малындан пай чыгъарма гъазир болмагъа уыйрет. <sup>19</sup> Шоллукъда, герти яшав алмакъ учун, олар гележегине кюрчю болажакъ хазналар топласынлар.

<sup>20</sup> Тимофей, бары да сагъа инанылып берилген затны сакълап тур. Аллагъсыз бош лакъырлардан ва инсанлар янгылыш болуп «илму» деп айтагъан затгъа байлавлу эришивлюклерден баш къачыр. <sup>21</sup> Шо «илмугъа» ес болгъанбыз деп айта туруп, бир тайпалар энни иманны ёлундан тайышды.

Аллагъны рагъмусу сизин булан болсун.